

LISTOVI...

GRAČANIČKI GLASNIK
časopis za kulturnu historijuBroj 59
Godina XXX
Maj, 2025.
[str. 247-264]

© Monos 2025

Listovi gračaničkog kalendara od 13. 11. 2024. do 6. 5. 2025.

*Dr. sc. Omer Hamzić***22. 11. 2024.****Prva (konstituirajuća) sjednica Gradskog vijeća
Gračanica**

Nakon polaganja svečane zakletve, čime su novoizabrani vijećnici zvanično preuzeli svoje mandate, javnim glasanjem za predsjedavajućeg Gradskog vijeća većinom glasova izabran je Mirza Okić (SBiH), koji je bio kandidat svoje stranke, te SDA i Narodne fronte koje čine većinu u Gradskom vijeću. Za zamjenicu predsjedavajućeg izabrana je Selma Begović, vijećnica SDA. Čestitke izbranim uputio je gradonačelnik Sadržmir Džebo i pozvao vijećnike da budu predstavnici svih građana (neovisno od partijske pripadnosti). Isto tako za sebe je rekao da se osjeća i da će biti gradonačelnik svih građana. Čestitke su uputili i funkcioneri Gradskog vijeća iz prethodnog saziva, te predstavnici političkih stranaka koje participiraju u Gradskom vijeću.

24. 11. 2024.**U Gračanici: centralna manifestacija Dana
državnosti za Tuzlanski kanton**

Obilježavanje su zajednički organizovali Gradska uprava Gračanica, Savez antifašista i boraca NOR-a Tuzlanskog kantona, Koordinacija boračkih organizacija grada Gračanica, Sportski savez i BKC Gračanica. Uz niz kulturnih i sportskih manifestacija organizovana je Svečana akademija kojoj je prethodilo polaganje cvijeća na Centralno spomen obilježje Odbrambeno-oslobodilačkog rata 92.-

LISTOVI...

95., Spomen kosturnicu boraca NOR-a i spomen bistu Josipa Broza Tita u centru grada. Ovim svečanostima prisustvovala su delegacije SUBNOAR-a sa cijelog područja Tuzlanskog kantona: iz Tuzle, Lukavca, Banovića, Doboj Istoka i Brčkog, kao i delegacija Vlade TK. Prisutne na Akademiji pozdravio je gradonačelnik Gračanice Sadmir Džebo, a glavni govornik u ime kantonalnog SABNOR-a bio je Mehmed Bajrić, ratni komandir policije u Tuzli. U okviru programa, nagrađeni su i učenici osnovnih i srednjih škola za literarne radove na osnovu prethodno raspisanog konkursa. Prigodne nagrade tokom svečanosti uručio im je predsjednik SABNOR-a TK, Zlatko Dukić. Program je dodatno obogaćen recitalom učenica Gimnazije "Dr. Mustafa Kamarić" Gračanica, dok je sopranistica Dženana Huseinagić svojim nastupom doprinijela svečanom raspoloženju. Učesnici skupa imali su priliku da u holu BKC razgledaju i izložbu «Antifašizmom za državu Bosnu i Hercegovinu».

6. 12. 2024.

Održana 2. sjednica Gradskog vijeća: odlučeno da sve sjednice Vijeća počinju državnim himnom, usvojen Nacrt Budžeta za 2025.

Nakon uobičajenih pitanja i inicijativa, na samom početku sjednice, na prijedlog vijećnika Avdić Arnesa usvojena je inicijativa kojom će svaka naredna sjednica Gradskog vijeća započinjati intoniranjem himne Bosne i Hercegovine. Potom je jednoglasno usvojen i Nacrt Budžeta za 2025. u obimu od 26.913.584 KM, uz

zaključak da se uputi na javnu raspravu do 16. 12. 2024. U nastavku sjednice vijećnici su usvojili Izvještaj o izvršenju budžeta za period 01. 01. – 30. 09. 2024. godine kao i Odluku o utvrđivanju javnog interesa za rekonstrukciju raskrsnice na cesti M4, te Izvještaj o realizaciji Lokalnog akcionog plana zaštite životne sredine Grada Gračanica (LEAP) za 2023. godinu. U izvještajno-informativnom dijelu sjednice, Gradsko vijeće je primilo k znanju Izvještaj o razvoju Grada Gračanica za 2023. godinu, Informaciju o legalizaciji bespravno izgrađenih objekata na osnovu Zakona o uslovima i postupku legalizacije bespravno izgrađenih objekata na području grada Gračanica te Informaciju o zimskoj službi na području grada Gračanica.

9. 12. 2024.

E-matičar novi e-servis u Gradu Gračanica

U okviru redizajnirane web stranice Gradske uprave (Grada) Gračanica, uz niz inovacija posebno se ističu E-servisi, koji bi trebalo da donesu brojne olakšice za sve građane pri kompletiranju određene dokumentacije za svoje potrebe. Među tim servisima ističe se E-matičar, koji omogućuje građanima da što lakše dođu do svojih dokumenata. Kreirana je mogućnost elektronskog podnošenja zahtjeva i dobijanja traženih uvjerenja i izvoda iz matičnih knjiga na kućnu adresu. Ovo će posebno dobro doći građanima koji žive i rade izvan granica naše zemlje, a takođe je olakšano i dobijanje izvoda i uvjerenja za sve one rođene

u Gračanici, koji žive izvan Gračanice, na prostoru BiH. Korištenje ovog alata je jednostavno i dostupno 24/7, čime se smanjuje potreba za fizičkim odlaskom u matični ured.

12. 12. 2024.

Promocija 58. broja Gračaničkog glasnika: "Stoljeće gračaničke biblioteke"

Prepoznajući značaj tog jubileja, ovoga puta Redakcija je odlučila da sve priloge i rubrike ovog broja posveti razvoju i dostignućima gračaničke biblioteke kao najstarije kulturne institucije u Gračanici. Tako je za ovu priliku u formi "Gračaničkog glasnika" kreirana mala monografija o toj kulturnoj ustanovi, njenom historijatu i osnivačima dr. Mustafi Kamariću i Hajrudinu Bujukaliću. Zato je i ova promocija upriličena kao dio završne manifestacije obilježavanja ovog jubileja, čiji je organizator bio Bosanski kulturni centar u okviru kojeg djeluje Biblioteka. Uz prigodnu izložbu i obraćanja, zaslužnim za uspješan rad i razvoj Biblioteke dodijeljena su pismena priznanja i zahvalnice. Promociji je prisustvovao veliki broj građana, među kojima i novi Gradonačelnik Gračanice Sadržmir Džebo, koji se kratko obratio prisutnim. Glavni gost promocije bio je prof. dr. Amir Duranović, sa Filozofskog fakulteta iz Sarajeva, koji je uz predstavljanje svog autorskog priloga u ovom broju "Glasnika" o osnivaču Biblioteke Mustafi Kamariću, pohvalio i napore Gračanice na kulturnom planu, pohvalio je i ovu manifestaciju, pa i "Gračanički glasnik". U obilju objav-

ljenih autorskih tekstova, memoarske i dokumentarne građe, u sadržaju ovog broja dominiraju tri historijske studije o Narodnoj biblioteci i njenim osnivačima koje potpisuju: prof. dr. Omer Hamzić, glavni urednik ovog časopisa, prof. dr. Amir Duranović sa Filozofskog fakulteta iz Sarajeva i magistar Edin Šaković, rukovodilac Gradskog muzeja Gračanica. Tu je i nekoliko zanimljivih proza Hajrudina Bujukalića, jednog od osnivača gračaničke biblioteke koje je objavio još kao student u časopisu "Gajret" tridesetih godina prošlog stoljeća.

12. 12. – 31. 12. 2024.

Tradicionalna manifestacija "Zima u Gračanici"

Organizatori su i ove godine BKC i Turistička zajednica uz podršku Gradske uprave. Održano je desetak koncerata i drugih muzičkih sadržaja u gradu i na gradskom klizalištu, doček Nove godine za mlade, kao i tradicionalni doček Nove godine u centru grada kod Sahat kule, na kojem je okupljene zabavljao već afirmisani interpretator narodne muzike, Gračanlija Mahir Mulalić.

23. – 30. 12. 2024.

Usljed obilnih snježnih padavina, proglašeno stanje prirodne nesreće

S obzirom da se stanje na terenu stalno pogoršavalo, na osnovu zaključka Štaba civilne zaštite, odluku o proglašenju stanja prirodne nesreće donio je Gradonačelnik grada Gračanica. Mnoge mjesne zajednice ostale su odsječene od Gra-

čanice, putevi su bili neprohodni, dvije trećine domaćinstava ostalo je bez napajanje električnom energijom i bez telekomunikacija, saobraćaj je bio u kolapsu... Od 25. 12. sve škole prekinule su rad. Zahvaljujući poduzetim mjerama i aktivnostima, ali i poboljšanju vremenske situacije, 27. 12. je saopšteno da je stanje na terenu dosta bolje, ali su i dalje određene mjesne zajednice i dijelovi grada još uvijek bili bez električne struje i vode. Nadležne službe, uz pomoć građana, kako je saopšteno, nastavljaju raditi na uklanjanju posljedica nevremena kako bi što prije došlo do normalizacije života građana u svim mjesnim zajednicama. Odluka o prestanku stanja prirodne nesreće na području Grada donesena je 30. 12. 2024. godine jer je ocijenjeno da se stanje normalizovalo. Gradski štab civilne zaštite uputio je zahvalnost svim učesnicima koji su to pomogli, uz napomenu da će nadležni i dalje pratiti situaciju, te reagovati u slučaju potrebe.

30. 12. 2024.

Održana 3. sjednica Gradskog vijeća: Gračanica na vrijeme "dobila" Budžet za 2025. u iznosu od 33 miliona KM...

...što je za nekih osam miliona više u odnosu na projekcije Budžeta u Nacrtu. Bez sumnje, Budžet je najvažniji dokument u kome je sažeta sva politika Vijeća i Gradonačelnika u predstojećoj godini. Sama činjenica da se donosi na vrijeme zaslužuje pohvalu. Kako piše na službenoj stranici Gradske uprave, "Gradonačelnik je istakao da Budžet osi-

gurava sredstva za ključne projekte razvoja grada, infrastrukture i unapređenje kvaliteta života građana." Ali, s obzirom da ulazimo u burna vremena, realno je očekivati rebalanse budžeta na svim nivoima, pa i na nivou lokalnih zajednica. Osim Budžeta, na dnevnom redu bilo je još desetak tačaka, među kojima i formiranje radnih tijela Gradskog vijeća, odnosno komisija, program rada Gradskog vijeća za 2025. godinu. Više informacija i izvještaja vijećnici su primili k znanju i o njima nije vođena rasprava. To su informacije o stanju u pojedinim oblastima i realizaciji projekata na području Grada Gračanica: o realizaciji projekta "poboljšanje sistema vodosnabdijevanja i proširenje sistema kanalizacione mreže; o realizaciji projekata koji su finansirani sredstvima viših nivoa vlasti i međunarodnih donatora; o upravljanju parking prostorom; o javnom prijevozu putnika; o stanju zaštite građana od neeksplozivnih i minskoeksplozivnih sredstava u 2024. godini; o stanju u kulturi i realizaciji projekata iz kulture; o stanju sporta na području grada Gračanica. Premda svaka od tih informacija donosi niz važnih podataka o kojima bi trebalo raspravljati (a nikad se ne raspravlja), ovdje ćemo izvući samo kratku komparaciju podataka o uloznim budžetskim sredstvima u oblasti sporta i kulture onako kako su prezentirani u tim materijalima. U toku 2023. godine iz Budžeta grada Gračanica izdvojeno je za sportsku infrastrukturu, process takmičenja sportskih klubova, kotizacije prema savezima i sl. ukupno 1.602.597,00KM (više od polo-

vine odnosi se na ulaganja u Sportsku salu “Bazen”). Putem transfera izdvojeno je 837.695,00KM što je u odnosu na 2022 godinu više za 77.449,00KM. U 2024. godini za kulturu je po planu izdvojeno 852.156,00KM, što predstavlja značajno povećanja u odnosu na prethodnu godinu (580.506 KM). Putem transfera usmjereno je za BKC 566.156,00KM od čega za režijske troškove, radio stanicu, biblioteku i takozvanu “prikazivačku” djelatnost 451.156, Zavičajnu zbirku-muzej 20.000 i za razne manifestacije i smotre u gradu i na terenu 95.000; finansiranje drugih aktivnosti iznosilo je 286.000,00 KM (skoro 90% odnosi se na razne sanacije društvenih objekata). Komparirajući ove podatke ovdje se ne postavlja pitanje da li treba više ulagati u sport ili u kulturu (jer malo je i za jedno i za drugo), već se radi o nepreciznoj metodologiji prezentiranja podataka koja sama po sebi ne odražava realno stanje “na terenu”. Kad je riječ o kulturi, na primjer transferi iz Budžeta prema BKC uključuju i finansiranje ličnih dohodaka, režijskih i fiksnih troškova, izdržavanje Radio stanice kao gradskog javnog servisa, kao i razna obilježavanja, tako da se ne vidi koliko se sredstava ulaže za kvalitetne kulturne sadržaje. U svakom slučaju, ni 50% transferisanih budžetskih sredstava ne ode za kulturu.

10. 1. 2025.

Ratni komandant gračaničke 111 (221) brigade nepravomoćno oslobođen optužbe za ratni zločin

Novinska vijest je glasila “Na Okružnom sudu u Doboju danas je predsjedavajuća Suda Snježana Banjac Lopandić objavila usmenu presudu u krivičnom predmetu protiv ratnog komandanta 111. (221.) gračaničke brigade majora Džemala Jukana, a u vezi krivičnog djela zločin protiv civilnog stanovništva, koje se Jukanu stavljalo na teret. I na samom početku, nakon što je sutkinja u kratkim crtama usmeno obrazložila optužnicu koju je protiv Jukana podnijelo Okružno javno tužilaštvo (OJT) Doboje, istakla je da Sud ovo krivično djelo van svake razumne sumnje nije mogao dokazati, te se optuženi Džemal Jukan oslobađa optužnice. Naime, optužnica je Džemala Jukana teretila da je 10. avgusta 1995. godine u svojstvu komandanta 111. (221.) gračaničke brigade naredio artiljerijskom vodu sa lokacije Lendići-Stjepan Polje, da iz protivavionskog mitraljeza (PAM) djeluje u rejonu Travnjak u Boljaniću kod Doboja po autobusu koji se kretao od Doboja prema Ozrenu, prilikom čega je u autobusu smrtno stradala Simuna Petković, a istog dana, na isti način, od projektila je na kućnom pragu smrtno stradala Cvijeta Raković u Boljaniću. Sudsko vijeće iz Optužnice nije moglo dokazati krivično djelo koje se optuženom stavlja na teret. Iz svih izvedenih dokaza nije se moglo utvrditi krivično djelo, niti dokazati krivičnu odgovornost optuženom, te je oslobođen optužbe” – izjavila je sutki-

nja Snježana Banjac Lopandić. *“Meni ova prvostepena presuda puno znači, kroz ovo se moralo proći. Da mi je svo ovo vrijeme bilo teško, jeste, da sam se umorio, jesam, i ja i moja porodica. Ovo je ne samo moja, već i pobjeda mojih saboraca, sprana je ljaga sa mojih saboraca, sa naših brigada, sa Gračanice i Doboja Istoka. Pobijedila je istina i nada da u pravosuđu ima profesionalaca i koji žele dokazati istinu i donijeti pravičnu sudsku odluku. Svo vrijeme na ročištima nisam doživio ni jednu neprijatnost.”*, kazao je Jukan. (<https://avaz.ba/vijesti/crna-hronika/950043/dzemalj-ukan-oslobodjen-od-optuzbe-za-ratne-zlocine>) (10. 1. 2025) Niko nije radosniji od Jukana i njegove porodice, s razlogom. Sa njim tu radost dijeli čitava Gračanica. Ali on sam zna kroz šta je i kako je prošao. Dijelevi radost sa komandantom, potpisnik ovih redova i njegov svjedok na dobojskom sudu, umjesto bilo kakvog komentara ima potrebu da podsjeti svoju Gračanicu i odgovorne osobe sva tri stuba vlasti (sudske, posebno) iz prošlosti i sadašnjosti (općinske i kantonalne) da za ubijenih 150 civila sa srpskih položaja oko Gračanice, ne samo da nikada niko nije sudski odgovarao, već nikada nije podnesena nikakva prijava, niti bilo kakav drugi akt da se ti zločini procesuiraju. A vjerovatno, kako je krenulo, ti procesi nikada neće biti ni pokrenuti. Dotle, kako se nezvanično saznaje, “druga strana” priprema nove optužnice protiv pripadnika A BiH iz Gračanice i ne samo iz Gračanice. P.S. Svoje stavove i komentara u vezi sa čitavom ovom problematikom iznio sam opširno

u 56. i 57. broju “Gračaničkog glasnika”. Tu su “crno na bijelo” detaljno opisani i dokumentovani svi srpski zločini po Gračanicu, tu su i moji očajnički pozivi svim nadležnim vlastima da napokon reaguju. Do sada, nažalost, šutnja – i, srećom, oslobađajuća presuda za ratnog komandanta 111. gračaničke brigade A BiH Džemu Jukana. I dok mu čestitke ovih dana upućuje i ko treba i ko ne treba, i ko je pomogao i ko nije mrdnuo prstom (a bio je dužan), potpisnik ovih redova pita se: ko će sljedeći biti optužen što je branio Gračanicu?

13. 1. 2025.

Izgrađeno još 530 metara kanalizacione mreže u Gračanicu

Radi se o projektu “Izgradnja prioriternih dionica kolektorske mreže u Gračanicu, faza II” u okviru kojeg je izgrađeno i rekonstruisano oko 530 metara oborinske i fekalne kanalizacije na prioriternim jedinicama kolektorske mreže u Gračanicu, što će značajno doprinositi poboljšanju komunalne infrastrukture u ovom području. Kako je zvanično saopšteno, uloženo je 128.970,00 KM. Projekat je finansijski podržao Fond za zaštitu okoliša Federacije BiH s iznosom od 78.250,00 KM, dok je ostatak od 50.720,00 KM obezbijeđen iz budžeta Grada Gračanice. Izvođač radova bila je firma HS Baukop doo Gračanica.

19. 1. 2025.**Organizovan Drugi memorijalni planinarski pohod “Habibovom stazom”**

Organizator pohoda je Planinarsko društvo “Zefir” Gračanica. Organizuje se u znak sjećanja na Habiba Džanano- vića – istaknutog prosvjetnog radnika, radio-amatera i planinara, koji je ostavio značajnog traga u svojoj sredini. Ispred Centralnog spomen-obilježja u Grača- nici, planinare je ispratio gradonačel- nik Sadržmir Džebo. Prijavljeni učesnici su se organizovanim prevozom zaputili na mezarje u Gornjim Doborovcima, gdje su odali počast i položili cvijeće na mezaru Habiba Džanano- vića. Sa po- četne tačke “Habibove staze” – lokalitet Kupresi, između Doborovaca i Gornjih Srnica, učesnici pohoda su, preko Vra- njevca, Privale, Monja i Serhatlija, pješa- čili sve do Bijelih voda i Bukve – stazom dugom oko 10 km. Na sredini staze do- čekali su ih i toplim čajem počastili lovci iz Lovačkog društva “Srndač” Gračanica – lovačka sekcija Doborovci, čiji je rahm. Habib također bio član, a na lokalitetu izletišta Bijele vode i članovi njegove po- rodice. Inače, pohod se odvijao u dosta teškim uslovima, po velikoj hladnoći, uz nanose snijega i dosta leda na stazi, polo- mljena stabla i druge prepreke – pohod je uspješno izveden, a svih 65 učesnika bez problema su prošli cjelokupnu “Habi- bovu stazu”, iskazavši tako na planinarski način sjećanje na čovjeka koji je dao zna- čajan doprinos njenom trasiranju, mar- kiranju i uređenju. (Radio Gračanica)

22. 1. 2025.**Gračanlija, profesor dr. Amir Karić, novi rektor Univerziteta u Tuzli**

Rođen je 1971. godine u Gračanici, gdje je završio osnovnu školu, a potom upisao Gazi Husrev-begovu medresu u Sarajevu koju je završio 1989. godine. Fakultet is- lamskih nauka završio je 1998. godine. Magistrirao je na Fakultetu političkih nauka u Sarajevu, 2005. a doktorirao 2010. godine. Učestvovao je na mnogim simpozijima i seminarima, a u okviru studijskih programa, 2002. godine, bora- vio je na Univerzitetu u Missouri i 2004. godine na Cornell Univerzitetu, 2008. godine na Kalifornijskom Univerzitetu u Santa Barbi u Sjedinjenim Američkim državama. Od 1997 - 2000. godine radio je kao profesor i odgajatelj u Behram-be- govoj medresi, a od 2000. godine radio je kao Glavni imam Medžlisa Islamske zajednice Tuzla. Akademsku karijeru započeo je na Pravnom fakultetu u Tu- zli izborom za docenta, 2011. godine, potom za vanrednog profesora 2016., i redovnog 2022. godine. Dolazi na čelo Univerziteta s bogatim nastavničkim iskustvom i sa funkcije dekana Pravnog fakulteta u Tuzli, gdje se u proteklom mandatu istakao na unapređenju obra- zovnih standarda i istraživačkih aktivno- sti. Autor je desetak knjiga i publikacija, te više stručnih radova i članaka, učesnik je na mnogim domaćim i međunarodnim naučim konferencijama itd. Objavljene publikacije i knjige: *Uvod u politički sistem*, Sarajevo: International Univer- sity of Sarajevo, 2022. (Koautor: Mirsad

Karić); *Politički sistemi: komparativna studija*, Sarajevo: International University of Sarajevo, 2022. (Koautor: Mirsad Karić); *Rječnik politike*, Tuzla: Centar za kulturu i edukaciju "Logos", 2021.; *O politici: bilješke na margini*, Tuzla: Centar za kulturu i edukaciju "Logos", 2018.; *Myth of Bosniak Pan-Islamism*, Sarajevo: Center for Advanced Studies, 2015.; *Muslimani u Evropskoj uniji*, Sarajevo: Dobra knjiga, 2015.; *Položaj muslimana u Evropskoj Uniji*, Sarajevo: Dobra knjiga, 2012.; *Panislamizam u Bosni*, Sarajevo: Connectum, 2006

28. 1. 2025.

Održana 4. sjednica Gradskog vijeća Gračanica: procijenjena šteta od prirodne nepogode (snježne padavine) krajem decembra 2024. godine iznosi 1.141.422 KM

Radi se o štetama na poljoprivrednim kulturama – platenici i voćnjaci (107.877 KM), štetama na građevinskim objektima i vozilima (722.831 KM), štetama od klizišta, na odronima i na putnoj infrastrukturi (135.000 KM) i ostalim štetama (65.500 KM). Ali to nije i konačni iznos štete prouzrokovane ovom prirodnom nepogodom, pa će uslijediti određene korekcije. Vijećnici su iskazali pohvale privrednicima i građanima koji su pritekli u pomoć na saniranju posljedica ee prirodne nepogode. Inače, početak sjednice bio je u znaku rasprave o građanskoj inicijativi Edise Sejdinović (više puta pokretanoj) za stambeno zbrinjavanje gračaničkog zlatnog paraolim-

pijca Hasana Sejdinovića. Inicijativa je odbijena zato što se nije mogao iznaći zakonski osnov za izdvajanje sredstava iz Budžeta za takve namjene, pa je zaključeno da se ovaj problem rješava putem humanitarnih akcija i solidarnosti (opet uz pomoć Gradske uprave) jer za to postoji spremnost i u široj javnosti. Pored nekoliko odluka, u izvještajno-informativnom dijelu sjednice, vijećnici su razmatrali Program rada, ostvarivanje politike Grada i aktivnosti gradonačelnika, te usvojili Izvještaj o rješavanju upravnih stvari u upravnom postupku u 2024. godini kao i Izvještaj o radu Gradskog vijeća Gračanica i radnih tijela (komisija), također u 2024. godini.

2. 2. 2025.

Završena dionica čišćenja korita rijeke Spreče u Donjoj Orahovici – lokacija Ibrića Polje

Završetak projekta pod nazivom "Obezbjedenje proticajnog profila rijeke Spreče u Gračanici na lokaciji 2 – MZ Donja Orahovica, dionica od izlaza iz Miričine u dužini od 650,83 metara nizvodno od očišćenog dijela" označen je posjetom mjesnoj zajednici Donja Orahovica delegacije Grada Gračanica na čelu sa gradonačelnikom Sadmiro Džebom i predstavnikom Agencije za vodno područje rijeke Save, Munira Trake, te obilaskom i razgledanjem same lokacije Ibrića Polje u Donjoj Orahovici. Radi se o projektu čišćenja korita rijeke Spreče koji je izveden uz podršku Agencije za vodno područje rijeke Save. Ugovorena vrijednost projekta iznosi 239.955,30 KM sa

PDV-om, a izvođač radova bila je firma Roothing d.o.o. Gračanica.

5. 2. 2025.

Izbor sportiste Gračanice: najbolji za 2024. su košarkašica Noa

Operhal (KK "Stars") i rukometaš Harun Mešinović (RK "Gračanica")

Najbolji sportski kolektivi su ŽOK "Gračanica" i RK "Gračanica". Ostale discipline i kategorije: *najuspješnija pionirka, kolektivni sportovi*, Lejla Mehurić ŽOK "Gračanica", *najuspješnija pionirka, individualni sport*, Lejla Duraković KK "Gračanica", *najuspješniji pionir, kolektivni sport*, Nedim Bešić NK "Bratstvo", *najuspješnija kadetkinja, kolektivni sport*, Ema Čabrić ŽOK "Gračanica", *najuspješnija kadetkinja, individualni sport*, Merjem Džafić ŠK "Gračanica", *najuspješniji kadet, kolektivni sport*, Naid Valjevac NK "Bratstvo", *najuspješnija juniorka, kolektivni sport*, Zumra Bajrić ŽOK "Gračanica", *najuspješniji junior, individualni sport*, Muhamed Šišić ŠK "Gračanica", *najuspješniji junior, kolektivni sport*, Edvin Šišić KK "Gračanica", *najuspješniji trener, kolektivni sport*, Abdulah Spahić MNK "Kaskada", *najuspješnija sportska radnica*, Džana Sakić RK "Gračanica", *najuspješniji nastavnik tjelesnog i zdravstvenog odgoja* Šefik Memić, *najuspješnija osnovna škola* JU OŠ "Hasan Kikić", *najuspješniji profesor tjelesnog i zdravstvenog odgoja* Nedim Šišić, *najuspješnija srednja škola* – JU MSŠ Gračanica; *Posthumna priznanja*: Samir Mešetović, za razvoj košarke na području Grada Gračanica i Husejin Ibrahimović, za ra-

zvoj rukometa na području Grada Gračanica; Posebna priznanja: Muhidin Halilović, za razvoj odbojke na području Gračanice, Ferid Imamović, za razvoj nogometa na području Gračanice, Suad Nurić, za doprinos u razvoju Udruženja nogometnih sudija sa područja Gračanice, Dino Džafo, navijač godine, te firme "Variplast", "Poly", Gradske apoteke Gračanica, bazeni "Terme", "Bema Ba", te OŠ "Hasan Kikić".

12. 2. 2025.

Gračanički vatrogasci dobili novu opremu u vrijednosti od cca 800.000 KM, koja je...

...demonstrirana pred većim brojem građana i zvaničnika Gradske uprave i Civilne zaštite Tuzlanskog kantona na poligonu ispred Sportske dvorane "Bazen". Nabavljeno je novo najsaveremenije vatrogasno vozilo sa nadogradnjom i vozilo sa hidrauličnom platformom. Radi se garnituri s kojom je napravljen ogroman iskorak u unapređenju sistema zaštite i spašavanja od požara za područje Grada Gračanice i šire za slučaj potrebe. Koliki je ovo iskorak u tehničkom opremanju vatrogasne jedinice govori i podatak, saopšten tokom prezentacije, da u zadnjih 50 godina ta jedinica nije dobila novo vozilo. Uglavnom se "krpilo" polovnom opremom, vozilima iz poklona i donacija itd. Prezentirana garnitura sastoji se od sljedećih segmenata: mercedesovog podvozja čija je vrijednost 212.070,55 KM, koja je rezultat inicijative Udruženja poslodavaca, uz snažnu podršku lokalnih privrednika; nadogradnja vozila

sa raznom opremom koju je finansirao Grad Gračanica u iznosu od 398.736 KM; novo vozilo sa hidrauličnom platformom čija je nabavka koštala 173.500 KM, dodatno podiže kapacitet vatrogasnih službi, omogućavajući im brže i učinkovitije intervencije. Ova nabavka sufinansirana je sredstvima Kantonalne uprave civilne zaštite. Tako je Gračanica, suočena dugi niz godina s problem zastarjelosti i nedostatka tehničke opreme vatrogasne službe, napokon dobila modernu opremu kao adekvatan odgovor na izazove ubrzanog privrednog razvoja, dinamične stanogradnje i povećanja broja stanovnika. Sa hidrauličnom platformom, koja je namijenjena za gašenje požara prvenstveno na visokim objektima znatno je unaprijeđena efikasnost vatrogasne službe za slučaj većih požara i drugih havarija.

18. 2. 2025.

Gračanica se bratimila sa Općinom Darica (Dah-ri-dža) u Turskoj

Gradonačelnik Grada Gračanice, Sadmir Džebo, i načelnik Općine Darica, Muzaffer Biyık, (Grad Kocaeli, Republika Turska) potpisali su Povelju o bratimljenju Grada Gračanice i navedene turske općine. Svečanom činu potpisivanja Povelje u Općini Darica prethodilo je donošenje odluke o uspostavljanju trajne saradnje u vijećima obje lokalne zajednice. Svoje potpise na Povelju stavili su Gradonačelnik Grada Gračanice, Sadmir Džebo i načelnik Opštine Darica, (Grad Kocaeli) Muzaffer Biyık. Pored gradona-

čelnika, tom činu prisustvovala je brojna delegacija Gračanice: federalni zastupnik u Parlamentu F. BiH, Rahim Gadžić, direktor Međunarodnog foruma solidarnosti "Emmaus", Hamzalija Okanović, član Udruženja poslodavaca Gračanice, Eldin Hadžibegović, Semir Garip, šef odjela MFS "Emmaus" u Sarajevu i savjetnik gradonačelnika Gračanice, Senad Smajlović. Cilj bratimljenja je uspostavljanje trajne saradnje i prijateljskih odnosa između dvije lokalne zajednice, radi razmjene iskustava i unapređenja društvenog i ekonomskog razvoja: poduzetništvo, investicije, obrazovanje, kultura sport, turizam itd. Inače, okrug Darica (Dah-ri-dža) u provinciji Kocaeli, zahvata površinu od 23 kvadratna kilometra na sjevernoj obali zaljeva Izmit u regiji Marmara, 38 kilometara jugoistočno od Istambula i 10 kilometara od aerodroma "Sabiha Gökçen". Područje je naseljeno još od antičkih vremena, a ime Darica potječe od bizantske tvrđave Ritzion. Darica je poznata po zoološkom vrtu Faruk Yalçın i brojnim, za turiste zanimljivim društvenim događanjima.

27. 2. 2025.

Održana 5. sjednica Gradskog vijeća Gračanica: odbijena Odluka o novoj lokaciji za gradsko groblje

Nakon podugačke rasprave o dnevnom redu prihvaćena je odluka o imenovanju sastava vijeća mjesnih zajednica i pojedinačno za svako vijeće mjesne zajednice. Usvojena je i odluka po kojoj će se ubuduće vršiti sva "kadroviranja" u gradskoj upravi i javnim preduzećima i ustano-

vama pod uobičajenim birokratskim naslovom: "Odluka o utvrđivanju standarda i kriterija za imenovanja/nominiranja na upražnjene pozicije u reguliranim organima grada Gračanica". Među usvojenim materijalima, od značaja je i Odluka o pristupanju izradi regulacionog plana "Radna zona II" i Odluku o zamjeni nekretnina. Nakon duže rasprave vijećnici su odbili Odluku o lokaciji za izgradnju gradskog groblja/mezarja na kojoj su stručne službe u proteklom periodu uložile dosta truda da je usklade sa propisanim poprilično zahtjevnim standardima. Od nekoliko lokacija, kao najpovoljnija, bila je odabrana lokacija na Hajrijinom brdu (Drafnići), površine 1.17 hektara, u vlasništvu Grada Gračanica. Prema Prostornom planu općine Gračanica, radi se o parceli koja se nalazi u urbanom području i koja ima status gradskog građevinskog zemljišta. U blizini te parcele već se nalaze dva mezarja. Do lokacije postoji javni put koji je u jednom dijelu trebalo još samo malo proširiti da bi se mogao koristiti kao dvosmjerna saobraćajnica. Sve su to prednosti koje su stručne službe imale u vidu, tražeći najpovoljniju lokaciju za gradsko groblje kao jedan od najprioritetnijih problema u gradu. Ipak, vijećnici su odbili ponuđeni prijedlog, bez nekih ozbiljnijih argumenta, uz zaključak da se hitno pronade nova lokacija za gradsko groblje. U nastavku sjednice, većinom glasova su prihvaćena rješenja o imenovanju stalnih radnih tijela Gradskog vijeća. U informativno-izvještajnom dijelu djeđnice razmatrani su i usvojeni još i

sljedeći materijali: Izvještaj o realizaciji programa rada, ostvarivanju politike grada i aktivnostima gradonačelnika za 2024. godinu, o izvršenim procjenama prometa nepokretnosti i prava za 2024. godinu, Informacija o stanju zaštite od požara i vatrogastva, praćenja i izvršenja plana zaštite od požara na području grada Gračanica u 2024. godini, Informacija o realizaciji programa podrške razvoju poslovnog sektora Grada Gračanica 2024.–2026. za 2024. godinu i Informacija o realizaciji vijećničkih inicijativa i pitanja u 2024. godini.

28. 2. 2025.

Povodom Dana nezavisnosti: svečani defile u Gračanici "Srcem za Bosnu i Hercegovinu"

Okupljanje učesnika bilo je ispred sportske dvorane "Bazen". Nakon prigodnog kulturno-umjetničkog programa i održanih patriotskih govora, defile je krenuo ulicama Gračanice, a završio polaganjem cvijeća na Centralno spomen-obilježje i odavanjem počasti poginulim borcima u ratu za Bosnu i Hercegovinu. U dugoj koloni, pod državnim zastavama i svečanim transparentima, ulicama Gračanice prodefilovao je impozantan broj članova boračkih organizacija, javnih ustanova, kulturno-umjetničkih društava, sportski klubovi, udruženja, đaci iz svih škola s područja Grada sa svojim nastavnicima i mnogi građani.

19. 3. 2025.**Objavljen turistički vodič
"Gračanica – osjeti duh bosanske
čaršije"**

Turistička zajednica Gračanice objavila je prvi turistički vodič grada u posljednjih 10 godina, autora Edina Šakovića. Ovaj vodič, sa svoje 44 stranice, pruža sveobuhvatan pregled kulturno-historijskog naslijeđa, prirodnih ljepota i znamenitosti Gračanice, te predstavlja ključni resurs za sve posjetioce zainteresovane za dublje upoznavanje ovog kraja. Njegova izrada predstavlja značajan korak ka unapređenju turističke ponude Gračanice i očuvanju njenog naslijeđa istakao je za lokalne medije Edin Ibrišević, direktor Turističke zajednice. Ovaj vodič u narednom periodu postat će vrijedan izvor informacija za sve koji žele istražiti i doživjeti autentičnost i ljepotu Gračanice, grada bogate historije i kulture.

8. 4. 2025.**Izložba "Armija Republike Bosne i
Hercegovine: formiranje, razvoj i
odbrana domovine"**

...otvorena je za posjetioce u foajeu Bosanskog kulturnog centra Gračanica, a realizovana je u saradnji te ustanove i Muzeja Istočne Bosne iz Tuzle. Autor izložbe je Nermin Ibrić, viši kustos Muzeja, koji je i predstavio izložbu, Prirodnom obraćanjem izložbu je otvorio Gradonačelnik Gračanice Sadržim Džebo i pozvao građane, posebno omladinu da dođu i posjete izložbu u narednih nekoliko dana. Ovom izložbom, inače, započinje program obilježavanja Dana Armije RBiH na prostoru Tuzlanskog kantona, čiji je domaćin ove godine Gračanica. Centralna manifestacija održana je na sam Dan armije, 15. aprila.

3. 4. 2025.**Održana 6. sjednica Gradskog
vijeća Gračanica: kadroviranje i
izvještaji, izvještaji...**

Prihvaćeno je nekoliko odluka iz oblasti prostornog uređenja, geodetskih i imovinsko- pravnih poslova i finansija, te više odluka, vezanih za razrješenja i promjene u upravnim i nadzornim odborima u javnim preduzećima i ustanovama, kojima je osnivač Grad Gračanica, što je uobičajena praksa poslije svakih lokalnih izbora i promjene vlasti. Razmatrani su i planovi upisa u prve razrede Gimnazije i Mješovite srednje škole Gračanica, te izvještaji o radu u prošloj godini javnih preduzeća i ustanova kojima ja Grad osnivač: Centar za socijalni rad,

Bosanski kulturni centar, Dječje obdanište, Gradske apoteke i Dom zdravlja sa informacijom o higijensko-epidemiološkoj situaciji na području Grada Gračanica. Takođe su razmatrani i izvještaji o odabiru i realizaciji projekata po javnom pozivu za omladinske, nevladine i sportske organizacije za 2024. godinu, te Izvještaj o održanim lokalnim izborima 2024. godine.

7. 4. 2025.

Obilježen 7. april Dan oslobođenja Gračanice u Drugom svjetskom ratu

Obilježavanje je započeto okupljanjem i polaganjem cvijeća na centralno spomne-obilježje Odbrambeno-oslobodilačkog rata 1992. – 1995. i polaganjem cvijeća na spomen-kosturnicu boraca NOR-a i spomen –bistu Josipa Broza Tita u centralnom parku u Gračanici. U sklopu programa obilježavanja ovog datuma obavljena je i promocija knjige “Srpski nacizam”, autora Ekrema Avdića iz Tuzle. Promotori su bili prof. dr. Amir Karić i prof. dr. Enver Halilović.

11. 4. 2025.

Delegacija turskog grada Darica (Dah-ri-dža) u uzvratnoj službenoj posjeti Gračanici

Radi se o gradu sa kojim je Gračanica potpisala Povelju o bratimljenju 18. februara ove godine. U delegaciji iz Turske bili su općinski vijećnici koje je predvodio načelnik općine Muzaffer Biyik. Po programu posjete, u multimedijalnoj sali grada Gračanica održana je svečana sjed-

nica kojoj su prisustvovali vijećnici oba grada. Nakon prigodnih govora, gradonačelnici su razmijenili simbolične poklone, a kasnije obavili radne dogovore o daljoj saradnji. Delegacija je položila cvijeće na Centralno spomen obilježje i razgledala znamenitosti Gračanice. Sve u svemu, ova posjeta je znak da potpisana povelja o bratimljenju neće ostati mrtvo slovo na papiru.

15. 4. 2025

U Gračanici: Centralna manifestacija obilježavanja 33. godišnjice formiranja Armije Republike Bosne i Hercegovine za Tuzlanski kanton

Organizator manifestacije (koja se ove godine odvijala pod sloganom “Armija živi”), bila je Vlada TK, odnosno Ministarstvo za boračka pitanja, a nosilac aktivnosti je bio Savez demobilisanih boraca TK u saradnji sa gradskom upravom i boračkim organizacijama Gračanice. Vizualni identitet manifestacije – pozivnice, plakati i promotivni materijali – izradili su učenici osnovnih i srednjih škola sa Kantona, koji su imali priliku da kroz kreativni izraz iskažu kako oni vide Armiju RBiH. Manifestacija je počela svečanim postrojanjem pripadnika Armije RBiH iz svih općina Tuzlanskog kantona, uz prisustvo brojnih građana građana i omladine kod Centralnog spomen-obilježja u Gračanici, te polaganjem cvijeća i odavanjem počasti poginulim borcima Armije RBiH i civilnim žrtvama rata 1992. – 1995. Potom je uslijedio defile učesnika od Spomenika do platoa ispred

Fiskulturne dvorane “Bazen”, gdje je održana svečana akademija. Tu su se obratili najviši kantonalni dužnosnici i predstavnici kantonalnih boračkih organizacija. Između ostalih, u ime Grada Gračanice kao domaćina kratak pozdravni, na momente emotivan govor (kao dijete šehida) održao je i gradonačelnik Sadmir Džebo, koji je, između ostalog poručio: “Mi, djeca šehida, nismo odrasli u mržnji – odrasli smo u ljubavi prema domovini. Nas nije stid glasno reći da su nam očevi šehidi. Armija RBiH je naš temelj, naš štit i naša čast. Bez nje, ne bi bilo ni mene, ni vas, ni Bosne i Hercegovine.” Nakon obraćanja ostalih zvaničnika izveden je prigodan kulturno-umjetnički program. Tokom dana održano je i takmičenje u streljaštvu (12 učesnika) i šahu (10 učesnika). Na kraju manifestacije priređen je zajednički ručak i druženje svih učesnika Manifestacije u restoranu “Etna” u Gračanici.

17. 4. 2025.

Gračanička firma “Plastoflex” u procesu digitalne transformacije i automatizacije

Među domaćim kompanijama koje uveliko koriste benefite savremenih načina proizvodnje nalazi se i kompanija “Plastoflex”, koja je počela sa radom sada već daleke 1979 godine kao mala privatna radionica za proizvodnju i preradu plastike. Na svom dinamičnom razvojnog putu bavila se i nekim sporednim djelatnostima, preživjela rat i ambiciozno nastavila sa proizvodnjom koja se uglavnom zasnivala na manuelnom načinu

rada. Totalni zaokret uslijedio je 2008. godine. “Mi smo tada krenuli u zamjenu hidrauličnih, odnosno energetski neefikasnih mašina jer je prerada plastike oblast prepoznata kao značajan potrošač električne energije. Paralelno smo išli i na povećanje efikasnosti te smo prevashodno nabavili mašine sa servo-pogonom, a danas imamo super modernu opremu, bez hidraulike”, izjavio je za portal “Klix.ba” Suad Helić, suvlasnik i direktor kompanije. Po njegovim riječima u nabavku novih mašina dosad je investirano oko 400 hiljada eura. Sa tom opremom ostvaruju se uštede samo na električnoj energiji od 50 do 70% u odnosu na ranije korištene hidraulične mašine. Radi daljih povećanja ušteda u potrošnji električne energije, instalirana je i solarna elektrana. Tako je potrošnja struje smanjena sa 1,2 na 0,8 kilovata po kilogramu prerađenog granulata plastike, što predstavlja značajnu uštedu, tvrdi Helić. U dosadašnjem procesu digitalizacije i automatizacije proizvodnje “Plastoflex” je imao značajnu podršku i kroz program Go Digital in BiH putem kojeg je dobio finansijska sredstva za svoje investicije od Evropske banke za obnovu i razvoj (EBRD) i bespovratna sredstva Evropske unije. Ne treba zanimariti ni konsultatntsku podršku za tu investiciju koja je od posebnog značaja za preduzeća poput Plastoflexa (izvor: <https://www.klix.ba/biznis/privreda/digitalni-uspjeh-plastoflexa-iz-gracanice-transformacija-koja-je-olaksala-posao-radnicima/250404175>, pregled: 20. 4. 2025.)

24. 4. 2025.**Potpisivanjem sporazuma i primopredajom ključeva, biblioteka Kulturnog centra Rašljeva, postaje Područno odjeljenje Narodne biblioteke “Dr Mustafa Kamarić “Gračanica .**

Kulturni centar u Rašljevi izgrađen je i otvoren 2017. godine na inicijativu generala Fikreta Muslimovića (koji je, inače, rođen i djetinjstvo proveo u Rašljevi). Sve aktivnosti oko gradnje Centra vodio je uporedo sa gradnjom nove džamije u Rašljevi kao predsjednik građevinskog odbora. Nakon izgradnje džamije, preuzeo je brigu o funkcionisanju Kulturnog centra, koji je, uz džamiju, predat Medžlisu Islamske zajednice Gračanica. Osim dvije stalne izložbe (o gradnji džamije i gradnji vodovoda), u središtu pažnje bila je upravo biblioteka, koja je zahvaljujući Muslimoviću dostigla fond od preko 5.000 vrijednih knjiga. Preuzimanjem te biblioteke, Bosanski kulturni centar, počinje se vraćati tradiciji Narodnog univerziteta, koji je nekada imao svoj bibliotek i desetak isturenih odjeljenja u većim selima – sve u cilju približavanja knjige čitaocu. Reafirmaciju te “dobre prakse” iz prošlosti obećao i Edin Šaković, odskora v.d. direktora Bosanskog kulturnog centra, potpisujući sporazum o preuzimanju biblioteke u Rašljevi, čime je i formalno uspostavio prvo istureno odjeljenje gračaničke biblioteke u ovom novom vremenu. Na taj način ovaj vrijedan legat knjiga u Rašljevi dobiva zakonsku zaštitu i postaje sastavni dio bibliotečkog fonda Narode biblioteke “Dr. Mustafa

Kamarić” iz Gračanice. Voditeljica biblioteke g-đa Senada Letić obećala je da će ubrzo nakon ove primopredaje uslijediti stručna obrada preuzetog fonda, koji će se staviti na raspolaganje svim zainteresovanim čitaocima, kako iz Rašljeve tako i sa šireg područja Gračanice.

28. 4. 2025.**Održana 7. sjednica Gradskog vijeća Gračanica: povučeni sa dnevnog reda redovni izvještaji o radu javnih preduzeća Vodovod i kanalizacija, “Komus” i Veterinarska stanica**

Sudeći po toku ove sjednice, može se reći da je uveliko počelo kadrovsko “pospremanje” po gradskim organima uprave i javnim preduzećima i ustanovama iz nadležnosti Grada u skladu sa rezultatima lokalnih izbora, 7. oktobra prošle godine... Na prijedlog Kluba SDA na ovoj sjednici sa dnevnog reda povučeni su izvještaji o radu javnih preduzeća i ustanova Veterinarska stanica, Vodovod i kanalizacija i “Komus”. Odbijanje redovnih izvještaja o radu javnih preduzeća i ustanova u nadležnim skupštinskim tijelima već odavno je “išaret” da je rukovodiocima tih ustanova i preduzeća koje je dovela prethodna vlast “istekao rok trajanja” – što je, inače, praksa na svim nivoima vlasti. Doduše, u konkretnom slučaju, do povlačenja tih izvještaja, kako je medijima objasnio predsjedavajući Gradskog vijeća, došlo je “zbog zainteresovanosti vijećnika da bolje prouče materijale budući da se radi o izvještajima o radu javnih preduzeća”. Vezano za

inicijativu da se nadležnom ministarstvu uputi zahtjev za odobrenje rada trgovina na području grada nedjeljom, dogovoreno je da se o tome obavi posebna rasprava na tematskoj sjednici Vijeća koja će biti zakazana sljedećeg mjeseca. Na ovoj sjednici vijećnici su razmatrali i budžetske izvještaje za prošlu i prva tri mjeseca ove godine. Tako je ukupan prihod sa primicima i prenesenim viškom u 2024. iznosio 29.037.078 KM, a rashodi i izdaci 23.504.956 KM. Višak prihoda i primitaka nad rashodima i izdacima u iznosu od 5.516.332,00 KM nastao je, kako je obrazloženo, usljed toga što jedan broj projekata za koje su bila obezbijeđena sredstva nije realizovan do kraja budžetske godine, pa su preneseni u 2025. Realizacija budžeta u prva tri mjeseca 2025. bilježi izvjestan podbačaj u odnosu na planirane okvire, što je i očekivano za taj period godine. U takozvanom izvještajnom dijelu sjednice razmatrano je nekoliko informacija od kojih vrijedi spomenuti informaciju o dodjeli stipendija učenicima srednjih škola i studentima za školsku 2024/2025. godinu iz koje prenosimo podatak da je od ukupnog broja prijavljenih učenika, njih 93 ostvarilo pravo na dobijanje stipendije, 45 nije imalo dovoljan broj bodova, a 6 nije ispunjavalo uslove konkursa. Što se tiče studenata, njih 128 je ostavilo to pravo, a 22 je odbijeno jer nisu ispunili uslove. Primjene su "k znanju" i sljedeće informacije: o radu Općinskog suda u 2024. godini, o stanju bezbjednosti i o zbrinjavanju napuštenih i izgubljenih ži-

votinja (pasa lutalica) na području grada Gračanica u 2024. godini.

2. 5. 2025.

U Sokolu kod Gračanice otkrivena dva spomen obilježja u znak sjećanja na branitelje Bosne (1992. – 1995.)

Tim povodom je u organizaciji tek formiranog Udruženja veterana i u prisustvu velikog broja građana i boraca Odbrambeno-oslobodilačkog rata organizovana skromna svečanost. Upriličeno je otkrivanje spomen-ploče na objektu nekadašnje ratne bolnice ispod stare srednjovjekovne utvrde (u kojoj su tokom rata spašeni mnogi životi ne samo vojnika, već i civila s čitavog područja Gračanice) i Spomen obilježje "Veterani Soko" u znaku ljiljana. Tokom svečanosti na staroj srednjovjekovnoj utvrdi zavihorila se državna i zastava sa ljiljanima. Bilo je i više prigodnih obraćanja zvaničnika Mjesne zajednice. Posebno zanimanje izazvalo je obraćanje ratnog komandanta OG-2 Armije BiH brigadira Osmana Puškara pored novootkrivenog spomenika, koji je poručio: "Nama je bilo namijenjeno da budemo Palestina. No, nas, nikad niko i nikada otjerati iz naše domovine neće moći. Kome ona nije po volji, neka ide iz nje. Mi nikoga ne ugrožavamo..." (Izvor: H. Čalić, "Avaz", 3. 5. 2025.)

5. 5. 2025.**U Gračanici se proizvode industrijski roboti za tržište Evropske unije – proizvođač: kompanija “Metron automation”**

Otvorena je i počela sa radom prije šest godina sasvim skromno, sa dvoje zaposlenih (otac i sin, mladi inženjer), danas zapošljava 30 mladih stručnjaka, pretežno iz oblasti elektronike. Njihovi roboti već se koriste u velikim industrijskim pogonima, u više zemalja Evropske unije. Trenutno testiraju robotsku ćeliju za zavarivanje kao pilot projekat. “Ovo je za našeg kupca, Volkswagen, i predstavlja veliki iskorak u našem poslovanju”, izjavio je za novine Senail Mehić, inženjer elektronike u firmi. U konkretnom slučaju, ta robotska ćelija uveliko olakšava procese u proizvodnji kabina. Neće više biti potrebe za ručnim manipulisanjem kabinama tokom zavarivanja – robot precizno i automatski to preuzima. Zadatak operatera je da sastavi i pripremi kabinu, a robot potom preuzima zavarivanje s vrhunskom tačnošću. Firma iz Gračanice, koja je, inače, u italijanskom vlasništvu, posebno je ponosna na svoj mladi tim. Više od polovine zaposlenih ima manje od 30 godina, a u kolektivu rade i studenti na praksi, kao i mladi koji su se zaposlili odmah nakon srednje škole. U Gračanici tako nastaje tehnolo-

gija koja spaja domaće znanje i svjetske industrijske standard. (Izvor: <https://tuzlanski.ba/vijesti/bih/inovacije-iz-gracanice-robotska-celija-za-zavarivanje-koga-se-koristi-i-u-evropskoj-uniji/991533>, pregledano: 5. 5. 2025.)

6. 5. 2025.**“Na tragu neviđenog”: u BKC Gračanica otvorena likovna izložba Gordane Savić Mehmedović iz Gračanice i Amele Dubravić iz Tuzle**

Zajednički naslov ove izložbe objedinjuje različit tematski okvir i likovni izraz ove dvije umjetnice Dok Gordana Mehmedović “slika i crta aktove, mrtve prirode, pejzaže i apstrakcije u različitim tehnikama”, za Amelu Dubravić veliki izazov su murali kao forma i snaga žene ka vječna tema. Kao i u Tuzli, krajem marta, ova izložba je, sudeći po broju i reakcijama prisutnih na njenom otvaranju, ostavila dobar utisak i izazvala interes gračaničke publike. Izložbu je otvorio V.D. direktora BKC Edin Šaković, kao domaćin. Oni koji nisu mogli prisustvovati činu otvaranja, imali su priliku pogledati izložbu u narednih nekoliko dana u foajeu Bosanskog kulturnog centra. Reprodukcije slika Gordane Savić Mehmedović sa ove izložbe objavljujemo u ovom broju našeg časopisa.



Plave planine, Australija